

PASSION (PANAONON)

**PARTANGIANGAN PASSION
MARNINGOT PANAONON NI TUHANJESUS
BORNGIN III**

**HKBP JATINEGARA
Rabu, 16 April 2025**

1. Tangiang na hohom / Saat teduh - Melodi

2. Marende: BE 84: 1 – 2 “Aut Na Ginorga tu Rohangku”

☞ *Aut na ginorga tu rohangku, bohiM di na lao mate Ho
Aut na huingot o Tuhanku, tongtong panghophopMi di
au*

*Ai Ho do paluahon ahu, dosangku do pinorsanMi
Didaoni Ho parsahitonku, martua au binahen ni i*

Jongjong

☞ *Sai jalo ma au ale Tuhanku, Baen upa ni na tinaonMi
Sai naeng ingoton ni rohangku, tung sasude na
binaenMi*

*Humophop au pardosa godang, dibahen holong ni
rohaM*

*Hinorhon ni~i tarbaen au sonang, laho mandapothon
banuaM*

3. Votum-Intro-Tangiang:

P : Marhitehite goar ni Debata Ama dohot goar ni AnakNa
Tuhan Jesus Kristus dohot goar ni Tondi Parbadia.

H : Amen.

P : Tagan jolma Kristus, dipelehon do angka pangidoanNa
dohot eleh-elekNa, mardongan angguk bolon dohot
iluilu tu na tuk paluahon Ibana sian hamatean.

H : Jadi ditangihon do Ibana, gabe malua sian hatahuton i,
ai atik pe Anak Ibana, diguruhon do pangoloion marhite
sian na tinaonNa i!

P : Jadi dung rimpas, gabe sihorhon haluaon saleleng-
lelengna do Ibana di sude na mangoloi Ibana. Haleluya,
Martangiang ma hita: Ale Tuhan Debata, Amanami na
di banuaginjang, Parasiroha na sumurung! Na mandok

mauliate ma hami tu Ho sian nasa rohanami ala dilehon
Ho AnakMu na sasada i tu hamatean humophop hami,
asa unang mago na porsea di Ibana, alai asa hangoluan
na saleleng ni lelengna di nasida. Tatap ma hami, ale
Amanami di bagasan AnakMu Jesus Kristus, na gabe
habadiaon dohot hatigoran di hami. Sai sesa ma
dosanami saluhut, ala ni pelean na sun denggan, na
pinelehonNa i humophop hami, sai paeleng ma
pinggolMu tu tangiang nami, jala asi ma rohaM di hami
marhitehite AnakMu. Tuhan Jesus Kristus Tuhannami.
Amen.

4. Koor : Ina Jatinegara

5. Marende: BE 81: 3 “Jesus Mual Ni Ngolungku”

☞ *Bugang sada tanggurungMu Di na hona linsing i
Hamamalum ni bugangku Na di rohangki do i
Ho do gabe binuraan, Au dapotan hangoluan
Ala ni hupuji Ho, Tung marribu hali do*

- 6.** Tatangihon ma udut ni partinaonan ni Tuhan Jesus andorang so sahat tu hau pinarsilang i. Alai disungkun Sintua ni malim i ma Jesus taringot tu angka siseanNa dohot taringot tu podana i. Jadi dialusi Jesus ma ibana ninna ma: Patar do HatangKi di hatoropan. Na tongtong do Ahu mangajari na sailaon di bagasan parguruan nang di bagas Joro pe, parpunguan ni saluhutna halak Jahudi. Nandang adong manang aha huhatahon marsibuni. Boasa Ahu disungkun ho? Nasida naung umbege hatangKi, i ma sungkun! Ai diboto nasida do na Huhatahon i.

Dung didok Jesus songon i, dipastap sada oppas na jongjong disi ma Ibana, huhut ma didok; songon i pangalusiM tu Sintua ni malim i? Dung i ninna Jesus ma mangalusi ibana: Ia na hurang na Hudok, hajongjonghon na hurang, alai anggo na hona do, boasa pastaponmu Ahu?

Asa disuru si Hannas ma Ibana naung tinali i tu Sintua ni malim si Kayapas, disi do marpungu angka siboto surat dohot Sintua ni natorop. Alai sai mangihut do si Petrus mandaodao sahat ro di alaman ni Sintua ni malim i. Laos bongot ma Ibana tu bagasan, laho hundul tu si rap dohot angka naposo marnida ujungna. Alai anggo angka Sintua ni malim ro di sandok rapot godang i, mangalului panindangion gapgap dompak Jesus, na tuk mambahen Ibana marutang hosa.

Alai parpudi ro ma dua halak, ninna ma: Didok Halak on: Tarbahen Ahu do mangalohai Joro ni Debata jala pajongjongonNa i sumuang di bagasan tolu ari.

Dung i hehe ma Sintua ni malim i, mandok tu Ibana: Nandang alusanMu na hinatindanghon ni nasida dompak Ho? Alai sai hohom do anggo Jesus. Dung i dipanghulingi Sintua ni malim i ma Ibana ninna: Hupatolon ma Ho tu Debata Siparngolu i, asa dipaboa Ho tu hami manang na tutu Ho Kristus, Anak ni Debata!

Dung i didok Jesus ma tu ibana: Songon na nidokmi ma tutu! Alai Hudok ma tu hamu: Olat ni on ma idaonmuna Anak ni Jolma i hundul di siamun ni hagoon jala ro di atas ombun ni langit. Gabe diribakhon Sintua ni malim ma paheanna mandok: Na mangaleai Debata do Ibana. Pola luluan dope sitindangi? Nunga dibege hamu pangaleaionNa i! Beha do di rohamu?

Dung i ninna nasida ma mangalusi: Marutang hosa ma Ibana! jadi ditijuri nasida ma bohiNa, na deba manompuk, na deba mangalingsingi huhut mandok: Surirangi hami, Kristus, ise do na mamunu Ho? Alai na hundul do anggo si Petrus di alaman i, jadi didapothon sada parompuan ma ibana mandok: Dohot do ho dongan ni Jesus na sian Galilea i? Alai diporso si Petrus do, didok ma: Nandang adong huboto, jala ndang huantusi na nidokmi! Laos ruar ma ibana tu alaman jolojolo, jala martahuak ma manuk. Alai marnida ibana, diulahi naposo boruboru i ma mandok tu angka na jongjong disi. On do sada sian nasida. Alai mamorso muse anggo Ibana. Jadi dung satongkin nari, didok angka na jongjong na disi ma muse mandok si Petrus: Atehe tongon do ho dongan nasida, ai halak Galilea do ho. Gabe dipungka si Petrus ma mambuburahon dirina huhut manolonlon didok ma: Nandang hutanda jolma na nidokmuna i! Dung i mamintor martahuak ma manuk paduahalihon. Jadi diingot si Petrus ma na nidok ni Jesus i tu ibana: Tolu hali do soadahononmu Ahu, andorang so martahuak manuk paduahalihon. Jadi marningot i, tumatangis ma ibana.

Jadi dung diida si Judas Iskariot parjehe i, na naeng hona uhum nama Jesus, disolsoli ma rohana, dipaulak ma na tolupulu rupia i tu angka Sintua ni malim dohot tu Sintua ni bangso i, ninna ma: Sala do ahu, hujehon do hape na so marpipot! alai didok nasida ma: Nandang ro di hami i! Ho do na sari disi. Jadi ditimpalhon ma perak i tu bagasan joro i, laos sumurut sian i laho maningkot. Alai dibuat Sintua ni malim ma hepeng i, ninna ma: Nandang jadi padomuon i tu arta ni Joro, ai tuhor ni mudar do i! Jadi mardos ni roha ma

nasida manuhorhonsa tu ladang ni pande hudon,
bahen parbandaan ni halak dagang. Alani i do
umbahen margoar i, Ladang Mudar ro di sadari on.

7. Koor : INA ESTER

8. Marende: BE 83: 2 “Na Lao Do Birubiru I”

☞ *Ianggo Birubiru i, Ima alealengku*
Na paluahon tondingki, Disuru Debatangku
Didok mandok AnakNa i, Sai topot ma pardosa i
Naung sun tinoruanHu, Balga tutu do rimasHi
Alai tarbaen do mombun i, Horhonon ni mudarMu

9. Jesus diparuhuman ni si Latus

Asa ditogihon nasida ma Jesus sian jolo ni si Kayapas
tu kantor. Alai sogot ma manogot i. Nandang na bongot
anggo nasida tu kantor asa unang tarsubang nasida
laho manganhon Paska i. Gabe ruar ma si Latus
mandapothon nasida, didok ma: Pangaluan dia do
diboan hamu dompak Halak on?

Dung i, ninna nasida ma mangalusi: Aut unang so
sibahen na jahat Halak on, ndang tagamon pasahaton
nami Ibana tu ho. Gabe ninna si Latus ma mandok
nasida: Boan hamu ma Ibana, uhum hamu ma Ibana
marguru tu adat muna. Alai ninna angka Jahudi ma
mandok Ibana: Nandang jadi pusaonnami manang ise,
jadi dialuhon nasida ma Ibana, ninna: Na dapot hami
do On pabalik-balikhon bangsonami jala mangorai
mangalehon guguan tu Kesar di pandok: Raja, Kristus
do Ibana.

Jadi dibongoti si Latus ma muse kantorna dijou ma
Jesus, didok ma tu Ibana: Atehe, Ho do Raja ni Jahudi?

ro ma alus ni Jesus: Na sian roham do na nidokmi manang na nidok ni halak do i tu ho taringot tu Ahu? Gabe dialusi si Latus ma: ai halak Jahudi do ahu! bangsomi dohot angka Sintua ni malim i do pasahathon Ho tu ahu, aha do na binahenMu?

Jadi dialusi Jesus ma: Nandang sian portibi on HarajaonKu, ndang tarbahen so mangalo angka naposongKu asa unang sahat Ahu tu tangan ni angka Jahudi. Alai ndang songon i harajaonKi. Dungi ninna si Latus ma mandok Ibana: Asa raja do Ho? Jadi ninna Jesus ma mangalusi: Songon na nidokmi ma tutu. Raja do Ahu: Umbahen na tubu Ahu jala umbahen na ro Ahu tu portibi on, asa Huhatindanghon hasintongan i. Ganup na sian hasintongan i, tangihonon ni i do soarangKu.

Jadi ninna si Latus ma mandok Ibana: "Aha ma i hasintongan i?" Jadi dung didok songon i, ruar ma Ibana muse manopot angka Jahudi mandok tu nasida: Nandang jumpang ahu manang dia salaNa. Alai lam digogohon nasida ma mandok: Digunturi Ibana do bangso i, ai mangajari do Ibana di sandok tano Judea mamungka sian Galilea sahat ro tuson. Alai umbege i si Latus, manungkun ma ibana, manang na halak Galilea Jesus. Jala dung diboto na sian gomgoman ni si Herodes Ibana, disuru ma Ibana tu jolo ni si Herodes, ai tongon do Ibana di huta Jerusalem uju i.

10. Koor : GABUNGAN

11. Marende: BE 162 : 3 – 4 “o Debata Mansai Balga”

☞ *I pe tu Ho nama au ro, sai unang tulak ahu
Paombun ma o Debata, rimasMu mida ahu*

☞ *Ai mudar ni AnakMu i, do gabe pardengganan
Sae utanghi binaenNa i, di hau na pinarsilang*

12. Dipaborhat si Latus Jesus tu si Herodes

Marnida Jesus i si Herodes, las situtu ma rohana; ai nunga nania lelengna, sai naeng idaonna tanda sian Ibana sipatupaonNa. Jadi godang ma disungkunhon tu Ibana; alai ndang dialusi Jesus Ibana. Di si do angka Sintua ni malim ro di sibotosurat, jala gogo-gogo do Ibana dialuhon. Ia si Herodes rap dohot donganna, direherehei jala dilealeai do Ibana, disolukhon ma pahean na arga tu Ibana, laos songon i ma disuru Ibana mulak tu si Latus. Jadi di na sadari i ma maraleale si Herodes dohot si Latus, ai na masihosoman do nasida anggo na sailaon.

Alai peam do dipalua panguhum i di Pesta i sada halak na tarhurung, marguru tu na tinodo ni natorop. Alai adong ma tarhurung uju i sada parjahat na sumalin na margoar si Barabbas. Jadi di na pungu i nasida, didok si Latus ma tu nasida: Ise do dipangido hamu paluaonku, si Barabbas manang Jesus na targoar Kristus i do? Ai diboto do, late ni roha nasida do umbahen na dipasahat nasida Ibana. Alai sai disosoi angka Sintua ni malim rap dohot Sintua ni bangso i do natorop i, asa dipangido nasida malua si Barabbas, alai pusaon do anggo Jesus.

Dung i ninna panguhum i ma mandok nasida: Ise sian na dua i dipangido hamu paluaonku? Jadi didok nasida ma: si Barabbas, dung i didok si Latus ma tu nasida: antong aha ma bahenonku tu Jesus, na targoar Kristus i? Gabe saluhutna nasida mandok: Parsilanghon ma!

Alai ninna panguhum i ma: Ai aha ma na jahat dibahen? Jadi lam gogo ma dipanjouhon: Parsilanghon ma! Dung i ditogu si Latus ma Jesus, didokhon ma linsingan, jadi di dandani soldadu ma sungsang duri bahen tumpal, diampehon ma i tu uluNa; baju dapdap ma dialithon tu dagingNa. Dung i ro ma nasida tu joloNa mandok: Tabi di Ho, ale Raja ni Jahudi! laos dipastapi ma Ibana. Dung i ruar ma muse si Latus, didok ma tu angka Jahudi: Ida hamu ma, hutogihon do Ibana tu jolomuna asa diboto hamu na so adong jumpang ahu salaNa. Laos ruar ma Jesus manjujung sungsang duri jala marbaju dapdap.

13. Koor: Ama Jatinegara

14. Marende: BE 81: 4 “Jesus Mual Ni Ngolungku”

☞ *Sungsang duri ditumpalhon Panginsahi i tu Ho
Jala tolong dilibashon Tu uluM, pasiak Ho
I ditaonhon Ho, Tuhanku, Ala ni hajungkatonku
Ala ni hupuji Ho, Tung marribu hali do*

15. Didabu si Latus uhum tu Jesus

Jadi didok si Latus ma tu nasida: Ida hamu ma jolma i? Asa dung di ida Sintua ni malim dohot angka naposo Ibana, dijouhon nasida ma: Parsilanghon, parsilanghon ma Ibana! Dung i didok si Latus ma tu nasida: Boan hamu ma Ibana, parsilanghon hamu ma; ai dang jumpang ahu salaNa. Gabe dialusi angka Jahudi ma Ibana ninna ma: Marguru tu patik nami, ingkon marutang hosa Ibana dibahen do diriNa Anak ni Debata.

Umbege i si Latus lam ganda ma biarna. Dung i diulahi muse tu kantorna, didok ma tu Jesus: Sian dia do Ho? Alai ndang dialusi Jesus Ibana. Dung i didok si Latus ma tu Ibana: Ndang angkupanMu ahu manghatai? Ndang diboto Ho, marhuaso do ahu paluahon Ho jala marhuaso parsilanghon Ho? Jadi dialusi Jesus ma: Ndang adong huasom mangago Ahu, aut unang dilehon i tu ho sian ginjang. Dibahen i gumodang do dosa ni na pasahathon Ahu tu ho. Jadi olat ni i ma dilului si Latus dalan paluahon Ibana. Alai manjujui ma angka Jahudi, ninna do: Molo dipalua Ho do on, ndang aleale ni Kesar ho! Ai namangalo Kesar, i do ganup na mambahen dirina gabe Raja.

Asa dung dibege si Latus hata i. Ditogihon ma Jesus haruar, laos hundul Ibana di habangsa paruhuman i, na di inganan na margoar: Pantar Batu, (Gabbata didok anggo di hata Heber). Ima na masa di ari parhobasan Paska i, mareak hos ni ari. Dung i didok ma tu angka Jahudi: Ida hamu ma Rajamuna! Alai digogohon nasida manjouhon: Padao, padao ma i, parsilanghon ma Ibana! Dung i didok si Latus ma tu nasida: Parsilanghononku ma Rajamuna? Jadi dialusi angka Sintua ni malim i ma: ndang adong Raja nami dungkon ni Kesar i!

Asa dung di ida si Latus, na so marguna hatana, lam ganda tahe gaorna, dibuat ma aek mamuri tangnanna di jolo ni natorop i, huhut mandok: Lias do ahu sian mudar ni On! Hamu do na sari disi! Dung i ninna sude na torop i ma: Marsapata tu hami dohot tu ianakhon nami ma mudarNa i. Dung i saut ma dipalua si Barabbas. Alai anggo Jesus dilinsingi, dung i dipasahat ma, asa diparsilanghon.

16. Koor: NAPOSO

17. Marende: BE 412: 1 – 2 “Ndi Di Dolok Adui”

☞ *Ndi di dolok adui, Silang ni Tuhan i
Sap mudar, sap tijur do i,
Jesus mate disi, Asa malum dibaen
Sude angka gondok roha i*

Reff : *Dibaen i tung holong rohangki
Mida silang di Golgata i
Hupasolhot diringku tusi
Dompak Surgo pardalananki*

☞ *Dileaijolma i, Silang ni Tuhan i
Hape haluaon do i
Nang godang dosangki, Alai sesa do i
Dibahen mudar na durus disi*

Reff : Dibahen i tung holong rohangki

18. Jamita:

19. Marende: BE 76: 1-4 “Sada Nama Sangkap Ni Rohangku”

☞ *Sada nama sangkap ni rohangku di sandok portibi on
Ndang tagamon na so las rohangku, molo jumpang au
inon
Naeng ma sai ingoton ni rohangku, na binaen ni Jesus tu
tondingku*

☞ *Uju pinorsanNa i, saluhutna dosangki
Ingkon sai Ibana ingotonku, uju na tarpajal i
Tu hau pinarsilang ginantungkon, sai mabaor mudarNa i
Ai humophop au ditaon uasNa, asa dohot au muse upaNa
Ai ditatap do au on, di pandokNa: Nunga sun*

☞ *Jesuskusai paingot ahu Di dosangku di basaM
Ai andorang di na holom ahu Dipalambas Ho rohaM
Nunga leleng dilului Ho do Au na lilu asa unang mago*

Ditaon Ho na bernit i Lao manobus tondingki

20. Panutup: Tangiang & Pasupasu